

عملی مُعَلِّمِ دِلِ دِلِ

نماز — قیام ، قرائت ، رکوع ، سجود ، قعدہ اولی ، قعدہ
 اخیرہ — — صلوات خمس حقندہ ایضاحات — فاتحہ شریفہ وسورہ لر
 — فرض وسنت اولان نماز لر — اوروج — حج — زکات
 — بعثت سنیہ — ہجرت نبویہ — احد وبدر غزالی —
 حجة الوداع — ارتحال پیغمبری — خلفای راشدینک مناقبی

(ایکنجی کتاب)

دورہ اولی — ایکنجی صنف

معارف نظارتک صوک پروگرامنہ توفیقاً

ذکر واثات عموم مطاببت اشراہیک ایکنجی صنفارینہ مخصوصہ



کتابخانہ اسلام وعسکری

۴۶ — باب عالی جادہ سی — ۴۶

۱۳۳۲

شمس مطبوعہ سی

۴۳ — باب عالی جادہ سی نومبرو — ۴۳

بسم الله الرحمن الرحيم

دینمزی سوله

هیچ برشی یوق ایکن الله تعالی نك وار اولدیغنی
اوکرنڈك. وعقلمزك ایره مهیه جکی درجه ده بویوك
اولان قدرت وقوتيله هر شیئی یوقدن وارايتدیکنی
اگلادك دکللی اولادم ؟

— اوت آنه جکم، یرلری و کوکلری اولواللهدن
باشقه سنك یاراته مایه جغه قناعت کتیردم .

— یاوروم، یالکز دینمزك احکامنی بیلمه من
یتیشمز . بونلری بیلمکله برابر اینانمق وعمر من
اولدجه ایشله مک لازم در. بر خدمتجی نه قدر معرفتلی

اولورسه اولسون اکر ایشنی کوزلجه یامازسه افندیسی
آندن خوشنود اولماز .

حق تعالی به قارشی دین وظیفه لرنده فصو رایتهملی نز .
بزی مسلمان یاراتدیغندن دولای جناب حقه
حمد ایدهلم ، صوکرده دنیاده و آخرتده اعلا
اولمقلغمزه سبب اولان پیغمبرمز حضرت محمد
علیه السلامه حرمت ایدهلم .

حق تعالی هر نه امر ایتمش ایسه هپ بزم اییلکمز
ایچون در .

سکا آتشه آل سورمه نك ضررلی اولدیغنی
سویله مش اولسه م دوغرو سویلایکمه اینانیرسین
دکلی ؟ ایکیمز برلکده چامورلی بریولدن کیدرکن
شورادن کیتمه ، بورادن یورو دیسه م سوزیمی
دیکله رسین دکلی ؟

— البته .

— آتشك ياقيجي اولديغنى بيلديكك حالده سوزيمى
ديكله مه يوب ده آكا الكى سورمش اولسهك هم بكا
قارشى كلش اولورسين ، هم ده الك يانار .

چامورلى يولده يورومكله البسهكك بربادا ولاجغنى
بيليركن سوزلر مه اهميت ويرمه يوب ده ديديكمى
ياپاماش اولسهك هم بكا اطاعتسزلك ايتمش هم ده
ميز البسهكى كيرلتمش اولورسين .

— آنه جكم ، جناب الله بكا عقل ويرمش بيليرمكه
آتشه آل سورولمز ؛ بوندى باشقه سزك دوغرو سويله .
ديككگزه اينانيرم وسوزيكزدن ديشارى چيقمام .
— ايسته اولادم ، مسلمانلق ده طبق بويله در .
جناب حقك بو يورديغى شيلره اينانمق وبونلرى
ياپمق لازم در . سويله ، بزهانكى پيغمبرك امتى يز ؟



— حضرت محمد عليه السلام .

— او حالدہ بڑہ امت محمد دیرلر .

پیغمبر من افندی مزل جناب حق طرفندن بیلدیردیکی
او دوغرو شیلره اینا نایه و دیلمزله ده سویله مهیه
ایمان واسلام دیرلر .

جناب آلهک پیغمبر من واسطه سیله بیلدیردیکی
شیلر بر قانون درکه بوکا دین و شریعت دیتیر . دین
و شریعت اینا نایان کافر یعنی دینسز اولور .

بونکله برابر کیسه یه کافر دیه حقارتده بولونمق
ده تربیه مزه صیغماز . سویله اولادم : سن هانکی
دیندن سین .

— اسلام دینندن ایم ؛ فقط آنته حکم بونی
نه ایله اثبات اتملیم .

— کلمه شهادت کتیر مکله . هایدی بر کلمه



شهادت کتیر .

اشهد ان لا اله الا الله واشهد ان محمداً عبده ورسوله

— دینمیزی سوهم اولادم، دیننی سوهم برمسلمانک
 قلبندن الله قورقوسی چیقماز . الندن ودیلندن
 کیمسه یه فنالق کلز . خویی دائماً کوزل اولور .
 راحتله یاشار . دنیانک یالانجی اکلنجه لرینه قایلماز .
 آخرتده ده جنته کیدر .

— جنت وجهم بونلری اولجه ده ایشتم ؛
 فقط نه دیمک اولدیغنی ا کلا یامادم .

— بز اولدکن صوکره یه دیر یله جکنز .

— دیر یله جکمی یز ؟

— اوت ، عالم دائماً بویله قالما یاجق . بروقت
 کله جک که آلت اوست اولاجق ، یر یوزنده کیمسه



بولونما یا جق. او وقت بوتون اولولر تکرار دیر یله جک،
 بویله برکونه قیامت کونی دینیر. صوکره عرصات میدانی
 دینلن یرده طویلانه جق، بو حاله محشر دیرلر.

دنیا ده یاپدیغمز ایلمک لک و فناقلرک حسانی
 کوروله جک، آلهک امرلرینی طوتمش اولان مؤمنلر
 جنته کیره جکلر. اوراده مکافات کوره جکلر؛ آلهک
 امرلرینی طوتمایانلر ده جهنم دنیلن بریره کیده جکلر
 اوراده عذاب چکه جکلر در .

— بن اولد کدن صوکره جنته کیرمک ایستهرم.
 — اویله ایسه دنیا ده آلهک امرندن دیشاری
 چیقما مالیسین، برکناه ایشله رسهک هان توبه
 ایتلیسین، کیسه یه فذالق یاپما مالیسین.





خلاصه

بن مسلمانم ، اللهك امر ابتدیكى شیلری بيلمك ، بونلره اینئاق و بزه کوستریلن یولدن آیریلماق وظیفه‌م در . اللهك امرلرینه اینئایان کافر اولور . بن دینمی سوه‌رم . دین اسلام پك بویوک در . مسلمانلغی سوه‌ن اللهدن قورقار ، عبادت ایدر ، کیمسه‌یی اینجتمز . دائماً ای خویلو اولور . اولدکن صوکره جنته کیرر ، دینمك احکامنه اینئاماق و بونلری ایشله‌مه‌مك نه قنادر . بویله‌لری اولدکن صوکره جهنمه کیرر .

وظیفه‌لر

مسلمانلره اللهك امر ابتدیكى شیلری بيلمكدن باشقه ده‌انه لازم در ؟ — جناب حقه نیچون حمد ایتلی ؟ — مسلمانلرك اك زیاده کیمه حرمت و تعظیم ایتله‌لری لازم در ؟ — اللهك امرلرینی بيلمك ، بونلرك دوغرولقنه اینئاق و ایشله‌مك کیمك ایچون فائده‌لی در ؟ — برچو جوق آناسنه نصل اطاعتسنلك ایتش اولور ؟ — جناب حقه اطاعتسنلك نصل اولور ؟ — ایمان و اسلام نه‌یه دیرلر ؟ — کافر نه‌دیمك ؟ — هانکی



آدمه کافر دینیر؟ — اللهت قانونی نه در؟ — دین و شریعت
نه دیمک در؟ — دینی سون و طانیان بر آدم نصل اولور؟



افعال مکلفین

- قبزم بوکون سکا افعال مکلفیندن بحث ایدم جکم .
- افعال مکلفین نه دیمک؟
- بر مسلمان عاقل و بالغ اولونجه، یعنی قیز چوجوق
طقوز وارکک چوجوق اون ایکی یاشنه کیرنجه کندیلرینی
آکلامایه ویایدقیرینی بیلمهیه باشلارلر . او وقت آنلرده دین
وظیفه لرینی ایشله مهیه مجبور اولورلر .
- بک کوچوک چوجوقلردن غیری بوتون مسلمانلرک
دنیایه و آخرته متعلق ایشلهیه جکلری سکز شی واردرکه بونلره
افعال مکلفین دینیر. بو سکز شی شریعتمزک حکملری در.
- افعال مکلفینک نه اولدیغنی اکلادم آننه جکم .
- بونلرک برنجیسی فرض در .
- فرض نه دیمک؟
- جناب اللهک ایشله مه مزی امر ایتدیکی شیلره فرض دیرلر.
نماز قیلماق ، اوروج طوتمق ، زکات ویرمک ، حج ایتمک

آبی . بر مسلمان فرضه اینانوب ده پانمازسه جهنمه عذاب
چکر ؛ اینانمازسه دینسر اولور .

ایکنجیسی واجب در .

— واجب نه دیمک ؟

— بونلرده جناب اللہک امر ابتدکی شیلردر . فقط
شبهلی دلیل ایله اگلاشیلیمش یعنی بو امرلرک ایشله نیلمه سی
فرض اولانلر کی آچیق و قطعی اولارق بیلدیر یلمه مش در . بوکا
اینانمایان دینسر صایلممازسه ده ایشله یین ثواب قازانیر ، ایشله مه یین
جهنمه عذاب چکر .

— واجب نه کی شیلردر ؟

— قربان بایرامنده قربان کسمک ، رمضان شریفده صدقه
فطر و یرمک کی . هر حالده بو امرلری ایشله مه لی یز قیزم اولادم .
اوچنجیسی سنت در .

سنت پیغمبرمزمک دایما ایشله مش اولدقلری شیلردر .
جماعتله نماز قیلیمق ، مسواک قوالانق کی . سنتی ایشله مه یینلر
آخرتده پیغمبرمزمک شفاعتدن محروم قالیرلر . سنتلردن برینه
راضی اولمایان دینسر اولور .

دردنجیسی مستحب در . بوده پیغمبرمزمک آره صیره

ایشله دکاری شیلردر .



— نه کې ؟

— فقرايه صدقه ویرمک ، مبارک کونلرده اوروج
طوتمق وبوش وقتلرده الله رضا سیچون نماز قیلمق ، یتیملرک
کوکلرینی خوش ایتمک کې . بونلری یاپان ثواب قازانیر .
بز بونلری ایشله مهلی بز .

بشنجیسی مباح در .

— مباح نه دیمک ؟

— یایلوب یایلماسنده نه کناه ونه ده ثواب اولان شیرله
مباح دینیر . اوتوروب قالقماق ، یه یوب ایچمک کې .
— بک اعلا ، بنم جانم ایسته دیکی وقت یاتوب قالقسم ،
ایسته دیکم کې کولوب اکلنسم ، وقتلی وقتسز هر کوردیکم
شیئی یه یوب ایچسم ضرری یوق اویله می ؟
— خیر اولادم ، یاتوب قالقمانک ، یه یوب ایچمه نک ده
یولی واردر . بونلری اوکره نوب آکا کوره حرکت ایتمک
لازم در .

آلتنجیسی حرام در .

ایشلمه سی الله تعالی طرفندن منع ایدیلش اولان شیرله
حرام دیرلر . آناه و بابایه عاصی اولمق ، خرسزلق ایتمک کې .
حرامی ایشله بن جهنم عذابنه لایق اولور .



— آنه جكم ، انسان بيلمه يهرك باشقه سنك مالى آليرسه
حرام ايشله مشى اولور .

— اومالى بيلمه يهرك آلديغك فرقنه واردیغی وقت
کوتوروب صاحبنه ويررسه حرامدن قورتيلور . کندى مالى
اولمادیغی بیلدیکی حالدده صاحبنه ويرمزرسه حرام ايشله مش
اولور . حرامی انکار ایدن ويا حرامه حلال دین دینسز اولور .
— فقط ، بن بعضاً سنزه اطاعتسنزلک ایدیورم . بونلر

ایچون جهنمه عذاب چکه جکمی یم ؟

— اولادم، سن هنوز کوچوک اولدیغک ایچون قصوریگی
جناب حقده عفو ایدر، بن ده؛ لکن یاشک ایلریله دیکه قصور .
لرکده بویورسه ایشته او وقت ایشک فنادر . بونک ایچون
اطاعتسنزلکه آلیشمالیسین . کوچوکلکده آنالرینه قارشى
کان نیجه چوجوقلر وارکه، بوفنا طبیعتلرندن واز کچمه دکلرندن
بویودکلری وقت، آنالرینی و بابالرینی دو کمک ویک آجی سوزلرله
کوکلرینی قیرمق درجه سنده ایلری کیتمشلردر . بویله فنا
اولادلر دنیاده و آخرتده حقیر اولورلر .

— بن حرام ایشله مکدن صاقینا جغم .

— بوتون عمر گده اک بویوک وظیفه لر گدن بری بودر
اولادم .

بدنجیسی مکروه در . مکروه هر نه قدر حرام کبی

یاییلماسی مطلقاً منع ایدیلش دنیله مزسه ده بونکله برابرینه
ممنوع اولدینی ظن ایدیلان شیردر [۱] مثلاً طرناققرینی
اوزاتمی ، وجودده کی فضله قیللری طوتمق ، آبدست الیرکن
صوبی اطرافه صاحقی ، توتون ایچمک کی .

— بودیدیککز شیرلی قبول ایتمه مک ذاتاً ای برشی دکل که...

— مکروه اولماسنک سبی بو دگلی یا ... بونلری یاپاک
پیغمبرمک شفاعتندن محروم قالماسندن قورقیلور .
کونش دوغارکن ، تپه مزده ایکن و باتارکن نماز قیلماز .
— سبی ؟

— او وقت کونشه عبادت ایدیلش اولور که بونی یاپان
حرامه یقین برکناه ایشله مش اولور . یارمقلری جیتلا تمق ،
قهقه ایله کولمک کی حالارده مکروه در .
پیغمبر مزده بو کی حالار اصلاً کورولمه مش در .

اولادم ، نیم یامادیغم و ایسته مه دیکم شیرلی یاپسه ک طبیعی نندن
خوشنود اولسام ؛ بونک کی پیغمبر مزده مکروه ایشله ییلری
سومز و آخرتده شفاعت ایتمز . شونی ده دوشونه لم که ،
بویله مکروه ایشلری یایمایه آلیشه آلیشه بویوک کناهلر ایشله نیر .

[۱] جناب حق قرآن کریم کی امرلرندن بر قسمک مناسی آچیق در ،
بر قسمک مناسی حقه ده علماجه شبهه حاصل اولمش در . بونلره دلیل
ظنی دیرلر .

بونك ايچون عقلمزك اپي كورمه ديكى شيلرى نه ضررى وار
ديه يامامالى در .

سكزنجيسى مفسد در . مفسد ، آبدستى ، نمازى ،

اوروجى وسائر عبادتلى بوزان شيلردر . مثلاً آبدستلى
ايكن وجودك بر يردن قان و ابرين چيقماسى ، نماز قيلاركن
كولمك ويا لاقيردى ايتمك ، رمضانده اوروجلى ايكن وقتندن
اول يمك يه مك نمازى و اوروجى بوزار . او وقت انسان
هيچ عبادت ايتمه مش صاييلير . كناهده كيرر .



تاریخی منقہ لر

حضرت محمد علیہ السلام کی حیاتی

پیغمبر من افندیمن ربیع اولک اون ایکنجی کوننه تصادف
 ایدن نیسانک اون یدنجی کونی مکہ مکرمہ دہ دنیاہ کلش در .
 دنیاہ تشریف لرندن ایکی آی اول پدری عبدالله وفات ایتدی .
 بش یاشنه قدر حلیمہ نامندہ برسود ننه نک یانندہ بولوندی .
 آلتی یاشندہ ایکن والدہ سی آمنہ دہ وفات ایتدی . پدرینک
 وفاتندن صکرہ بویوک باباسی عبدالمطلبک حمایہ سنده قالدی .
 سکز یاشندہ ایکن عبدالمطلب دہ وفات ایتدی . عموجہ سی
 ابوطالبک حمایہ سنہ کیردی . حضرت پیغمبر سیاحت ایتہ بی پک
 سوه ردی . ابو طالب تجارتلہ مشغول ایدی . کیتدیکی
 مملکتلرہ حضرت محمدی دہ برابر کوتورور ، یاواش یاواش
 اونی تجارتلہ آلیشدیرزدی . شامہ کیدر لرکن بصری شهرندہ
 بحیرا اسمندہ بر راہبہ راست کلدی لر . بو آدم افندیمنک پیغمبر
 اولاجغنی طانیدی وکندیسنہ پک زیادہ حرمت ایتدی .
 پیغمبر من عقللی اولدیغی قدر دوغرو وامینتلی ایدی . بونک
 ایچون خدیجہ نامندہ طول وزنکین برقادین بوتون ایشلرینی
 حضرت محمدہ حوالہ ایتدی . رسول اکرم یکر می بش



یاشنده ایکن حضرت خدیجه ایله ازدواج ایتدی .
 او وقت حضرت خدیجه قرق یاشنده ایدی .
 پیغمبر من اوتوز بش یاشنده ایکن قریش قبیله سنی تشویق
 ایدرلک کعبه نك یکیدن قورولماسنه یاردیم ایتمشدی .



افندیمنزک پیغمبر لکی

حضرت محمد (صلی الله علیه وسلم) افندیمنز حضرتلری (هر سنه رمضان شریفده عائله سیله برابر مکهدن اوچ میل اوتوده (حرأ) طاغنه چکیلیر ، جناب حقه عبادتله مشغول اولوردی .
 رمضان شریفک اون یدنجی بازار ایرتسی کونی ینه بو طاغده تنهاجه عبادت ایدرکن جبرائیل علیه السلام کوروندی . جناب حق طرفدن کندیسنه پیغمبرلک کتیردی و سورۀ جایلله تبلیغ ایتدی . آبدست، نماز اصولی وایکی رکعت نمازی اوکرتدی . اوچ سنه صوکره جبرائیل علیه السلام ینه کندیسنه کوروندی ، و برآیت کریمه کتیردی . رسول اکرم افندیمنز



کوردیکی حالی حضرت خدیجه به آکلاتدی . اوده افندمرك پیغمبر لکنه ایناندی ، و دین اسلامی قبول ایتدی . صکره حضرت ابوبکر ایله حضرت علی ودها بعض بویوک ذاتلر اسلامی قبول ایتدیلر .

پیغمبر من ابتدا طانید قلوبنی ال آلتندن ایمانه دعوت ایلر ، اصحابیه قابالیجه عبادت ایدردی . تکرار برآیت کریمه نازل اولونجه هر کسی آچیقدن آچیغه حق دینه دعوت ایتدی . و بو مقدس وظیفه سنی بویوک برعزم ایله ایفا بویوردی .



پیغمبر مړك مناقب عالیه سی

پیغمبر من کولر یوزلی ، کوزل سوزلی ایدی . کندیسيله قونوشانلرك کولکلی آچیلیردی . اعتدالندن آریلماز ، قناعتی و تمیزلی سؤهر ، چوق کولمز و چوق یه مژدی .

کیجه لری دریدن یاییلمش بریاناقدده یاتار ، غایت فقیرانه بر حیات یاشاردی . اکثریا پاموقدن ، بعضاًده قیرمزی و چیزکیلی قماشلردن البسه کیردی . مرحمت ، شفقتی ، کرم و سخاوتی



چوقایدی . او قدر که شهدا اولادلرینی زیارتله محزون اولور ،
 مبارک کوزلرندن یاشلر دو کیلوردی . کیمسه نك قابنی اینجتمز ،
 دشمنلرینه بیله عفو ایله معامله ایدر ، انسانیتیه خدمت ایتمکدن
 باشقه برشی دوشونمزدی . حتی وفاتندن اول خسته خسته منبره
 چیقمش : « ای ناس ، هرکیمی اینجتمش ایسه ایشته آرقم ،
 کلسین اورسون ، کیمک بندن آلاجنی وارسه ایشته مالم ،
 کلسین آلسین » دیمشدی . وفاتنده آلتون و کوموش پاره سی
 چیقمامش ، یالکنز محمد رسول الله یازیلی کوموش مهری
 قالشدی .

یکرمی دوه سی ، یوز قویونی ، آلتی یدی کچییسی ، برده
 بیاض آتی و مدینه منوره ده بر آزی واری واردی ، بونلرک حاصلاتی
 لزوملی محللره ، بر قسمنی زوجه لرینه ، کیری به قالانی ده فقرایه
 ترک ایتشدی .



نمازه حاضرلو

تعریفات بسیطه

— اقربامزدن ویا قومشولرمزدن رعایتیه لایق بر خانمک





قارشيسنه كيرلى اثوابله ، كيرلى يوزله چيقايليرميسين ؟
 — خير آننه جكم ، يوزىمى كوزىمى سيهرم ، تميز اثوابى
 كيهرم .

— او خانمك ياننده ايكن او طه گده كندى كندىگه اوتورديغك
 كى اوتوراييليرميسين ؟
 — خير .

— باشكى طاوانه ، بره ، ديوارلره ، پنجره دن ديشارى به
 چويرمك كى خفيفلكار ياييليرميسين ؟
 — اصلا .

— ايسته ديكك كى قونوشاييليرميسين ؟
 — بكا برشى صورمادقجه لاقيردى ايدهم .
 — الحاصل هر وجهله كوزل كورونميه ، اوصلى وتربيه لى
 بولونمايه چاليشيرسين .

برخانمك قارشيسنده بوقدر كوچولورسهك نمازده جناب
 حقك حضورنده بولونديغك وقت پك تميز و اديبانه برطورده
 بولونماك لازم در دكلى ؟
 — اوت آننه جكم .

— بونك ايچون نمازه باشلامازدن اول ياياجق ايشلر من
 واردر .

— نه كى ؟

— وجودم ، البسه مطلقا تميز اولاجق : كيرلى ايسه مبيقانا جقم ،

